

弘

簡

錄

弘簡錄卷之九

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之十五

武宗皇帝諱炎穆宗第五子母妃韋氏以元和九年六月十二日生於東宮賜名灑初封穎王加開府儀同三司檢校吏部尚書文宗宣制初立陳王未遑冊禮次年正月二十疾大漸宰相李珣知樞密劉弘逸奉密旨令陳王監國中尉仇士良魚弘志矯詔立穎王爲皇太弟權勾當軍國政事陳王年尚沖幼未漸師資復還邸中是夜士良統兵迎太弟於十六宅赴少陽院翌日百官謁見於東宮思賢殿士良收捕宣詔院副使尉遲璋殺之屠其家四月辛巳卽位以楊嗣復攝冢宰十四日辛卯受冊

於正殿時年二十七爲人沈毅有斷喜愠不形於色素與安王溶爲文宗所厚異於諸王楊賢妃恃寵請立安王文宗謀於李珣不以爲然至是士良欲要援立之功乃發安王舊事賜二王并楊妃皆死二月乙卯大赦丙寅追尊母韋氏爲皇太后諡宣懿祔于太廟就寢園增築名曰福陵封仇士良楚國公魚弘志韓國公三月封宮人劉氏王氏並爲貴妃中書奏帝誕辰爲慶陽節初上之立非宰相意夏四月罷崔暉爲戶部尚書判度支楊嗣復潭州刺史以崔珙爲刑部尚書同平章事兼鹽鐵轉運使秋七月陳夷行復相八月壬戌葬章陵文宗所寵知樞密劉弘逸薛季稜率禁軍護靈駕至陵所自知不爲士良弘志所容欲殺之鹵簿使王起山陵使崔稜發覺不果而死甲子祔主太廟祧遷代宗庚午李珣罷是月易定軍亂逐節度使陳君賞復

合豪傑入城盡誅亂兵軍城復安九月召李德裕復相帝在藩邸頗好道術修攝之事於九天壇親受法錄右拾遺王哲諫不聽冬十月丙辰天德軍使田牟奏回鶻兵侵逼西域詔振武劉沔屯雲迦藍以備之丁巳徙蕭太后居興慶宮積慶殿號積慶太后十一月癸酉朔校獵雲陽江淮以南請復稅茶十二月封皇子峻祀王

會昌元年正月庚辰有事郊廟大赦改元二月壬寅車駕幸昆明池賜仇士良紀功碑詔僕射李程爲文三月貶嗣復湖州珽端州皆司馬進李德裕司空建靈符應聖院於龍首池夏四月德裕請立憲宗百世不遷之廟議者沮之復恐實錄書其父吉甫不善之跡辛丑有詔重修杜亞等希意皆爲削之五月辛未從兩省奏陞諫議大夫依舊制從四品仍分左右中丞品亦如

之六月庚子賜何進滔子重霸名弘敬授節度使辛丑中書奏
修時政記送史館壬寅名衡山道士劉玄靜爲銀青光祿大夫
崇玄館學士賜號廣成先生與趙歸真於禁中修法籙左補闕
劉彥謨上疏切諫貶爲河南戶曹乙巳勅今後中外上封論事
言諸人過惡並令付御史臺按問不得云畱中不下以杜讒邪
如臺司勘當果實必獎奉公苟涉加誣必當反問告示中外明
知此意秋七月己巳北方有流星經天彗復出室壁之間五十
六日始滅八月廻鶻烏介特勒奉太和公主告本國爲黠戛斯
所攻部落破散詔金吾大將軍王會宗正少卿李師偃往宣慰
賑粟二萬碩放公主入朝九月幽州軍亂逐其帥史亢忠推牙
將陳行泰爲留後無何復殺行泰立張絳雄武軍使張仲武起
兵誅之遣軍吏吳仲舒入朝德裕奏以前皆行脅制之術故不

可許今仲武先自發兵討亂似爲有名乃以仲武知留後事冬十月校獵棧陽上頗好武戲五坊小兒復得出入禁中賞賜甚厚十一月丁酉朔上朝郭太后從容問爲天子之道后曰在納諫上退悉取諫疏閱之自是出畋稍希五坊橫賜亦罷壬寅夜大星東北流其光燭地有聲如雷山崩石隕

二年春正月丙申朔拜撫王紘開府儀同三司遙領幽州大都督府長史張仲武知節度事時迴鶻屯近邊特命兵部郎中李式爲巡邊使察將帥能否歸奏振武劉河有威略可任大事乃以兼太原尹二月丁丑李紳入朝詔復相位兼判度支三月遣使冊立烏介可汗河東奏修杷頭烽舊戍以備回鶻德裕奏修東中二受降城以壯天德形勢從之夏四月乙丑朔宰相率百僚上尊號曰仁聖文武至神大孝皇帝甲申迴紇盟沒斯與國

相愛邪勿等二千六百人來降遣中人齎詔勞之賜沒斯姓名
李思忠改所部爲歸義軍拜爲軍使封懷化郡王耶勿歸義軍
副使賜名愛弘順六月甲子朔陳夷行罷中丞李讓夷爲中書
侍郎同平章事秋七月上幸左神策軍閱武備嵐州人田滿川
據州叛劉河討誅之烏介可汗上表乞助兵復國又借天德城
居駐詔咸不許遣使諭還漠南可汗不奉詔八月率衆過杷頭
烽北俘掠雲朔等州庚午詔發陳許徐蔡汴滑等六鎮之師以
河充南面仲武東面思忠西南面皆爲招討使會軍太原以討
之遣使者石戒直還賜可汗誓言中外將相咸請誅剪朕情深
姻好未忍幸災自今宜速擇良圖無貽後悔九月癸卯太原奏
迴紇移帳近南四十里索叛將盪沒斯詔河東幽州振武天德
各出大兵固稱盛寒請待春首惟思忠與李忠順及契苾沙陁

吐谷渾六千騎合勢先進上遣人賜公主冬衣并書冬十月丁卯封皇子峴益王岐亮王嶧德王嶸昌王十一月乙卯幸涇陽畋于白鹿原諫官高少逸鄭朗等闕內論奏方今用兵且宜倖止上改容謝之擢少逸給事朗左諫議大夫十二月忠順奏破迴紇劉河移軍靈州癸未京師地震

三年春正月師野次罷元會烏介帥衆倭逼振武河遣麟州刺史石維帥沙陁朱邪赤心三部及契苾拓拔三千騎襲其牙帳自引大兵繼之庚子大捷於殺狐山斬首萬級降部落二萬烏介被剄走保黑車子族迎公主至雲州丙午奏至上御宣政殿百寮稱賀庚戌加雉兼御史大夫檢校左散騎常侍豐州都防禦押蕃落等使河與仲武並檢校左右僕射二月庚申朔日食辛未黠戛斯遣使獻名馬求封册詔太僕卿趙蕃勞之上從德

裕言與結好令自將速平烏介黑車子乃遣使冊命三月公主
入京庚辰德裕追諭維州往事詔贈悉怛謀右衛將軍夏四月
昭義劉從諫卒軍中立從子稹爲節後上表請授節敕辛巳輟
朝贈從諫太傅詔稹護喪歸東都稹不奉詔上從德裕策決意
討伐令草詔賜成德王元逵魏博何弘敬出兵皆竦息聽命丁
亥輔忠武王茂元河陽邠寧王宰忠武皆節度使五月戊戌茂
元兵三千守萬善劉河兵二千守芒車關陳夷行兵一千守翼
城五百益冀氏辛丑削奪從諫并稹官爵拜元逵澤路北面弘
敬南面李彥佐行營諸軍皆招討使與河中河東河陽合力攻
討壬寅上於夜半書學士承旨崔鉉名拜爲中書侍郎同平章
事付學士韋琮草制宰相不預知是月禁中築望仙觀五百三
十九間六月西內神龍寺災王茂元遣兵馬使馬繼等將步騎

二千屯天井關南科斗寨稹遣衙內十將薛茂卿將親兵拒之
丙子詔於七月中旬招討兵五道齊進縱有求降皆不得受秋
七月戊子遣中丞李回宣慰河北三鎮令早平回懾澤潞甫至
鎮州奏拔宣務柵又擊堯山敗稹救兵加元逵同平章事八月
壬戌火星自前月蒼赤色動搖井中至十六日犯輿鬼時出兵
半年尚未有功乙丑稹將李丕來降議者多疑其偽德裕奏且
須賞之以爲忻州刺史甲戌茂卿破科斗寨馬繼被擒又焚掠
小寨十七時議鼎沸上頗疑之德裕又奏兵家勝負常事願陛
下勿聽丙子何弘敬自將全軍度漳水趣磁州拔肥鄉平恩殺
傷甚衆得稹勝帟指官軍爲賊稹又遣牙將張巨劉公直共攻
萬善期以九月朔合圍茂元非將才且有疾欲棄城走會王宰
引兵至乃以代之九月丙午王茂元卒戊申轉河南尹敬昕於

河陽使備饋餉王宰兼行營攻討使總萬善師以捍敵忠武軍數號精勇宰又治軍嚴整貽義人甚憚之薛茂卿以科斗之功怨與賞薄密與宰通時李彥佐自發徐州逗遛顧望德裕請代以天德石雄爲晉絳行營招討使仍令分兵襲城以備侵軼受代明日卽引兵踰烏嶺破五寨殺獲千計捷至上大喜稱雄真良將命德裕優賞之洵與仲武有隙恐以私憾敗事冬十月辛未徙洵義成軍拜前荆南李石河東節度使党項寇鹽州遷李彥佐靈州節度使十一月德裕奏党項愈熾請命充王岐爲靈夏等六道元帥擇中朝廉幹臣李回副之使安撫党項及六鎮百姓十二月丁巳王宰引兵攻天井關茂卿陽走遂克之關東西寨聞之皆退走李石初至河東奏克石會關會榆杜行營都將王逢請益師詔以太原兵二千赴之軍情不悅欲候過年都

頭楊弁乘幾激怒爲亂

四年春正月乙酉朔以用兵罷元會弁潛通澤潞殺軍將據軍府石會關復陷石奔汾州時議罷兵德裕復勸不許壬子榆杜戍兵自擁監軍使呂義忠擒楊弁盡斬其亂卒百寮稱賀二月甲寅朔日食丁巳罷石分司東都轉崔元式河東節度使己未石犖殺良馬等三寨一堡辛酉弁伏誅戊寅轉劉沔河陽節度使以激厲王宰王逢被積將康良佺退屯鼓腰嶺石會關仍降三月黠戛斯遣使入貢朝議以回鶻衰微吐蕃內亂欲復河湟四鎮以給事中劉濛爲巡邊使令與天德振武河東節度團練詳議以聞上志在神仙拜趙歸真左街道門教授先生排毀釋氏盡除去之夏四月宰進攻澤州六月癸丑仇士良先死追削贈授籍沒其家秋七月甲辰杜棕入相兼判度支鹽鐵轉運三

使始合爲一八月辛卯元逵弘敬各奏刑洛磁三州刺史襲問
王釗安玉并別將高元武各以城降乙未宰奏潞州將郭誼斬
積戍戍傳首并來降諸將一百五十人露布獻於京師上御安
福門受俘百寮稱賀加弘敬左僕射同平章事封廬江郡公元
達檢校司空兼太子太師太原郡公各食邑二千戶李德裕太
尉衛國公食邑一千戶石雄河中尹晉絳慈隰等州節度使王
宰太原尹北都留守河東節度觀察處置等使轉襄州盧鈞昭
義節度兼招撫使懷柔餘黨九月丁巳鈞入潞州厚撫其民人
情大洽一鎮獲安諸將郭誼劉公直王協安全慶李道德李佐
堯劉武德董可武并母裴氏弟姊從兄各四及伎術人郭諗蔣
黨皆斬之改河陽三城鎮遏使爲孟州割澤州隸焉與懷孟澤
自爲河陽節度使命石雄爲之乙亥德裕請上尊號五表乃許

冬十月上頻校獵幸鄆縣戊子貶牛僧孺汀州李宗閔漳州皆
刺史十一月又幸雲陽復貶僧孺循州長史流宗閔封州坐與
從諫通謀故也

五年春正月己酉朔宰臣率百寮上徽號曰仁聖文武章天成
功神德明道皇帝庚戌謁太廟辛巳祀南郊大赦天下時歸真
特承恩倖薦羅浮道士鄧元起有長年術遣中使迎之遣望仙
臺於郊壇諫官疏諭帝諭宰臣朕屏去聲妓宮中無事但要此
人道話耳德裕對曰臣不敢言前代得失只緣敬宗朝此人出
入宮掖以此人情不悅帝曰朕彼時已識此人呼爲趙鍊師亦
無甚過歸真遂與玄靜三人膠固議拆僧寺庚申盧弘宣除義
武軍節度使革去舊法之峻酷者於是河北始安三月遣陝統
李拭使回鶻冊封黠戛斯可汗崔鉉罷以兵部侍郎李回同平

章事夏四月勅祠部檢括天下寺及僧尼人數五月杜棕罷以戶部侍郎崔元式同平章事仍判戶部秋七月丙午朔日食庚子併省天下佛寺上州留寺一所僧十人下州寺並廢合遇行香日期於道觀行禮其上都中都每街留寺兩所僧三十人餘者令所在拆毀以葺東都太廟及公廨驛舍財貨田產沒官銅像鐘磬鑄錢鐵像爲農器金銀銷付度支衣冠士庶之家所有金銀銅鐵佛像定限一月納官違者依禁銅法處分所留僧改隸鴻臚不屬祠部其大秦穆護等祠並勒還俗計拆天下寺四千六百餘所招提蘭若四萬餘區還俗僧尼二十六萬五百人充兩稅戶內有外國人還本處收管收膏腴上田數千萬頃五臺山僧多奔幽州八月詔發昭義騎步兵戍振武臨行入城大謀節度盧鈞山城避之亂兵奉都將李文矩爲帥不從遣人迎

鈞復入鈞仍遣之戍潛兵前路盡殺之九月德裕請置備邊庫
領以度支郎中凡諸道所進助軍財貨皆入焉上餌方士金丹
性加躁急喜怒不常雖宰相奏事不敢久留冬十月上問德裕
外事對曰陛下威所不測故外人驚懼向者寇逆橫暴宜以威
制今天下旣平願以寬理時德裕秉政久宦官左右言其太專
上亦不悅十二月給事中韋弘質奏天寶已前中書除機密選
授之外其他政事皆與舍人商量自艱難已來務從權便決遣
萬機不暇博議今後諸侯表疏百寮奏事錢穀刑獄等望依故
事令舍人先叅可否擬議奏聞從之帝自秋冬以來希復游獵
頗覺有疾道士以爲換骨秘密其事劉玄靜固請還山許之是
歲天下戶四百九十五萬五千一百五十一較前歲差減

六年春正月罷元會己未南詔契丹室韋渤海牂牁昆明等國

遣使來朝二月丁丑上以党項侵盜不已決意討之庚辰以夏州節度米暨充東北道邠寧高承恭充西南道皆爲招討使丁亥勅京城諸道起來年正月公私行用並取新鑄銅錢其舊錢權停三數年文武百寮俸料一同丁酉新羅使金國連來朝辛丑夜東北流星如桃色赤其光燭地尾入大角西流穿紫微垣三月壬寅帝不豫從道士言以唐土德當從所生改名炎旬日疾篤口不能言宰相請見不許中外莫知安否人情危懼諸宦官密於禁中定策二十三日遺詔稱皇子沖幼須選賢德立光王怡爲皇太叔權勾當軍國政事是日帝崩年三十三諡曰至道昭肅孝皇帝廟號武宗八月壬申葬端陵德妃王氏自縊以從因以祔焉

開成中否政由闕寺當壁屢移維城獨峙雄謀勇斷

澤潞克平獨伸天討靡間盈庭貪生不達空渺孽興卒以
自隕墜厥令名

天王 唐一之十六

宣宗皇帝諱忱憲宗第十三子母鄭氏本李錡妾以元和五年
六月二十二日生於大明宮賜名怡幼歷艱難備嘗險阻初封
光王武宗崩後三月丁卯卽位樞前改今名年三十七帝外晦
內期嚴重寡言瞻視有異幼時似若不慧十餘歲遇重疾沉緘
忽有光輝燭身蹶然而興正身拱揖如對臣僚乳媪以爲心疾
穆宗視之撫其背曰此吾家英物賜以玉如意御馬金帶常夢
乘龍昇天其母戒勿復言人故罕知歷太和會昌間愈事韜晦
羣居游處未嘗有言嘗侍二帝幸十六宅宴集強誘其語以爲
笑樂稱爲光叔武宗氣豪恆不爲禮及監國之日哀毀滿容接

待羣寮決斷庶務咸當于理人方知其有隱德時德裕攝冢宰奉冊帝素知其專既罷語左右曰適太尉近我每一顧盼使人毛髮洒浙夏四月辛未始聽政尊母爲皇太后以白敏中同平章事罷德裕江陵尹劓其黨薛元賞忠州刺史轉馬植刑部侍郎充度支鹽鐵轉運使李石奏修東都太廟已畢詔迎寓主時議多言無兩都祔主之禮不聽辛酉封皇子渾瑊王涇雅王滋夔王沂慶王五月乙巳勅上都兩街舊留四寺外更添置八所改賜新名僧尼依前隸功德使度杖殺趙歸真等十二人六月禮儀使奏請復代宗神主於太廟以敬文武三宗同爲一代於廟東增置兩室爲九代十一室從之東川節度盧商爲兵部侍郎與馬植並同平章事秋八月量移牛僧孺衡州崔珙安州皆長史李宗閔郴州司馬楊嗣復江州李珣郴州皆刺史九月

轉李德裕東都留守冬十月祿享憲宗勅以功臣裴度杜黃裳
李愬高崇文配食十一月享太廟帝於穆宗爲弟於敬文武皆
爲叔太常博士閔慶之奏大禮有尊尊而不敘親親穆宗廟祝
文稱弟不當請與敬文武四室皆稱嗣皇帝從之十二月戊辰
朔日食命復名劉玄靜於衡山受三洞法籙

大中元年春正月戊申有事於郊廟大赦改元二月幽州仲武
奏破回鶻功加同平章事丁卯封皇弟惕彭王惲棣王皇子澤
潑王潤鄂王癸未早上憂形於色減膳徹樂出宮女縱鷹犬疏
理繫因時相敏中黨李咸訟德裕罪左授少保分司轉崔元式
門下侍郎韋琮中書侍郎同平章事三月丁酉禮部侍郎魏扶
奏所放進士封彥卿崔瑒鄭延休實有詞藝皆以父兄居重
位不令中選乃詔琮復試並合程度悉與及第今後但依常例

不得別有奏聞帝雅好儒術留心貢舉時或微行採聽輿論以
觀選士得失每山池曲宴學士屬和詩什公卿出鎮賦詩宴餞
凡對臣僚肅然拱揖鮮有輕易之言雖左右近習見之未嘗怠
惰大臣或獻章疏仰燒香盥手而覽之中外咸稱有貞觀之風
自武宗好巡遊禁人曲江亭宴聚勅自今進士放榜後依舊杏
園宴集天下靈山勝境并廢寺有宿舊名僧復能修剎一任住
持所司不得禁止夏四月己酉積慶蕭太后崩五月吐蕃論恐
熱乘國喪誘党項及回鶻寇河西河東王宰以朱邪赤心爲前
鋒戰于鹽州破走之上性友愛勅修百福殿成名曰雍和樓曰
親親廊舍屋宇凡七百間以處諸王子孫秋八月上數臨幸置
酒作樂擊毬盡歡諸王有疾或親至臥內存問憂形于色九月
欲於大明宮置五王院以處皇子之幼者名術士柴岳明相地

對曰臣庶之家遷徙不常故有刑尅禍福陰宅陽宅之分今陛下深拱法官萬神擁衛原書不載師亦無傳上善其言賜以束帛冬十月吏部奏前滅州縣官內復置三百八十三員

二年春正月甲子上受徽號曰聖敬文思和武光孝皇帝大赦上加意憲宗朝大臣子弟除黃裳弟勝給事中而授度子諡學士承旨二月庚子拜楚子令狐絢翰林學士令書貞觀政要於屏風正色拱手讀之又欲知百官名數約奏六品以下官卑數多皆吏部注擬五品以上則政府制授各有籍名曰具員乃命作具員御覽五卷常寘於案三月己酉崔元式罷以周墀守兵部侍郎同平章事五月己未朔日蝕六月己丑太皇太后郭氏暴崩時上疑先朝事或預謀故卽位加禮殊薄太后常不平又鄭太后本其侍兒有宿怨今爲帝母當配不欲以太后祔葬外

人異論頗聞被弑禮院檢討官王崧力爭之貶為句容令冬十一月壬午乃葬皇太后於景陵之側韋琮罷以崔龜從守戶部侍郎同平章事有勅憲宗實錄舊本并會昌所修新本並令中書史館進納如有抄錄在外委州府嚴加搜捕毋得輒留

三年春正月上思功德及民故在宮中嘗服澣濯之衣御食不過數品非母后伯膳輒不舉樂故事經行黃門先以龍腦鬱金藉地悉命去之與宰相論元和循吏周痺對以韋丹第一詔史館修撰杜牧撰遺愛碑賜之擢其子宙以爲御史二月涇原節度康季榮奏吐蕃論恐熱以秦原安樂三州及石門等七關兵民來降詔太僕卿陸航往喻旨仍令諸鎮出兵應接三月周墀以直言罷夏四月以崔鉉爲中書侍郎典兵部侍郎魏扶並同平章事五月上以右補闕鄭魯言徐州李廓在鎮不治預知必

亂擢爲起居舍人而用義成盧弘正爲武寧節度使至鎮誅亂首撫循其餘一境獲安六月癸未京師五色雲見勅先經流貶罪人許令歸葬秋七月靈武朱叔明奏取長樂州邠寧張君緒奏取蕭關鳳翔李北奏取秦州勅於蕭關置武州改長樂爲威州以秦州隸鳳翔八月乙酉河隴遺黎數千人集於闕下己丑上御延喜門見之皆歡呼舞蹈令解本服襲冠帶仍賜絹疋詔於三州七關募人墾闢土田及開營田贍以鹽利冬十月改備邊庫爲延資庫以白敏中判之西川節度杜棕奏取維州丙子宰相以克復河湟請上尊號上謂先帝嘗有志未遂而崩今始克成先志其議加順憲廟尊諡以昭功烈辛巳京師地震河西天德靈夏尤甚歷死戍卒數千人十一月幽州軍亂逐張直方推衙將周緝爲留後十二月甲戌追上順宗號曰至德弘道大

聖大安孝皇帝憲宗曰昭文彰武大聖至神孝皇帝己未山南
西道節度使鄭涯奏取扶州

四年春正月庚辰朔赦夏四月庚戌馬植罷六月戊申令狐綯
同平章事秋九月周繼率軍中請以牙將張允伸爲留後十月
右補闕孔溫裕言討党項兵連年無功戍饋不已上亦知其反
山邊帥侵暴乃以右諫議大夫李福爲夏綏銀節度使繼選儒
臣以代邊帥之貪暴者十一月壬寅以刑部侍郎劉瑑爲招討
党項行營宣慰使

五年春正月壬戌天德軍奏攝沙州刺史張義潮遣使來降以
爲沙州防禦使甲戌封皇子洽懷王淨昭王汶康王白太和以
來漕法大壞二月戶部侍郎裴休充諸道鹽鐵轉運等使始窮
究其弊運米增益時党項久未平上頗厭兵夏四月崔鉉建議

遣大臣鎮撫五月加白敏中司徒充招討党項都統制置軍於
寧州秋七月定遠城使史元破党項九千餘帳於三交合党項
平詔優恤死傷給復被寇百姓八月義潮舉瓜沙伊肅等十一
州戶口來獻詔於其地置歸義軍拜義潮節度使判官曹義金
爲長史自河隴陷蕃百餘年至是悉復冬十月宰臣奏邊事已
息惟諸寺尚未畢功陛下崇奉釋氏羣下莫不奔走恐財力有
所不逮望量加裁節其大縣遠於州府者聽置一寺鄉村毋得
更置所度僧亦宜擇選有行業者毋得雜以兇暴從之時上春
秋高太子未立羣臣莫敢言戊辰戶部侍郎魏瓘同平章事深
以爲憂因入謝極言繼之以泣時論重之十一月太子詹事姚
康獻帝王政纂十卷又撰統史三百卷自上開闢下盡於隋凡
帝王美政詔令制置鹽鐵錢穀損益用兵利害下至僧道是非

無不備載十二月盜斫景陵門戟是歲湖南大饑

六年春正月戊辰以隴州防禦使薛逵爲秦州刺史兼秦成階
經略使蓬果羣盜依阻雞山爲寇詔以果州刺史王贊弘討平
之夏四月甲辰白敏中罷都統轉西川節度使裴休守禮部尚
書同平章事五月党項復擾邊以畢誠爲邠寧節度使招諭党
項皆降河東李業縱吏民侵掠雜蕃又妄殺降者由是北邊擾
動閏六月庚子以盧鈞代爲節度使奏度支郎中韋宙爲副使
徧詣塞下悉名酋長諭以禍福邊境復安

七年春正月戊申圓丘肆赦上事鄭太后甚謹朝夕奉養不居
別宮舅鄭光奉朝請屢言其貧賜以金帛夏四月御史大夫鄭
朗爲中書侍郎同平章事冬十月弘文館大學士崔鈗進續會
要四十卷修撰官楊紹復世球薛逢鄭言等賜物有差是歲度

支奏河湟平天下所納錢九百二十五萬餘緡內租稅五百五十萬榷酤八十二萬鹽利二百七十八萬

八年春正月丙戌朔日食罷元會陝州黃河清上憤先朝中人擅權事多假借今逆黨略盡復慮人心不安丙申下詔洗雪餘從疏屬一切不問又樂聞規諫虛心聽納二月宰相奏拾遺補闕員缺當補上曰諫官要奉職不必多人如張道符牛叢趙璘輩使朕聞所不聞足矣自此諫官論奏門下封駁多屈意從之時方重惜章服或半歲未嘗賜人緋紫受者難得大爲光榮叢自司勳郎中出爲睦州刺史始賜以緋又重翰林學士不輕授人起居郎庾道蔚禮部員外李文儒遷官手校歲月惟恐或私近臣三月魏謩等上文宗寶錄四十卷頒賜銀器錦綵有差夏四月命雪王涯賈餗等寃五月以韋澳充翰林學士上嘗托以

論詩屏左右與之語曰近日外間謂內侍權勢何如對曰陛下
威斷非前朝之比上閉目搖手曰全未全未因問策將安出對
曰若與外廷議恐生變如昨不若就中擇有才識者與之謀上
曰此乃末策白衣黃衣綠至緋皆感恩纓衣紫便相與一黨矣
上又嘗與令狐紉謀紉恐濫及無辜奏曰但有罪勿捨有闕勿
補自然消耗至於盡矣宦官竊見其奏由此南北司與朝士益
相惡如水火秋九月丙戌右散騎常侍高少逸爲陝虢觀察使
有勅使過者怒餅黑鞭驛吏見血少逸封其併進及還賁配恭
陵自此關寺磐氣又因寶曆以來京城豪右大擾窮民冬十月
獵於苑北遇涇陽人樵採問其令爲誰曰李行言爲政何如曰
性執不容有勢者犯法上歸書其名帖於寢殿之壁無何除行
言海州刺史賜金紫以壁上帖示之以故姦臣畏法豪右斂迹

九年春二月復校獵渭上見醴泉父老聚於佛祠問以何爲答
曰縣令李君爽有異政考滿當去請府乞留故此祈俸後遇懷
州刺史闕手筆除之宰相莫測君爽入謝上以此獎厲衆始知
之其剛斷宏遠多類此三月試宏詞舉人委右丞盧懿權判吏
部東銓夏四月詔以州縣差役不均自今每縣據人貧富及役
輕重作差科簿送刺史檢署訖鎖於令廳每有役事委令據簿
定差以後悉皆遵行時上聰察疊記宮中廝役皆能識其姓名
天下獄奏一覽皆記之度支奏漬汚帛誤書漬爲清樞密孫慤
中意上不見輒足成之及中書覆入上怒令坐擅改者罪又嘗
密令韋澳纂次天下諸州境土風物及諸利害爲處分語他日
鄧州刺史薛弘宗入謝上勅戒州事人人驚服詢之皆處分事
中語也秋七月浙東軍亂逐觀察使李訥以性卞急遇將士無

禮貶爲朗州刺史以禮部侍郎沈詢代之監軍王宗景杖配恭陵仍詔自今戎臣失律併坐監軍又聞淮南饑民多流亡杜棕荒於遊宴不治甲午以崔鉉鎮揚州宴餞之日賦詩賜之罷棕分司東京冬十一月柳仲郢爲兵部侍郎充度支鹽鐵轉運使有醫工劉習因緣禁中勅補場官仲郢上言醫工術精宜補醫官若委務鹽鐵何以課其殿最上遽命賜絹遣之後又苦不能食名醫梁新診脈數日良已新因自陳求官亦勅鹽鐵賜之緡錢復詔勿令勅使知謂朕有私時教坊使祝漢貞樂工羅程有寵言及外事卽命正法或請赦之上曰此輩惟供笑樂而已豈宜縱之十二月右威衛大將軍康季榮前在涇原擅用官錢事覺上以其有開河湟功許用家財償之諫官不奉詔貶爲夔州長史人謂終帝之世賞罰明信

十年春正月裴休請早建太子上曰若建太子則朕遂爲閒人
休不敢復言一月以疾辭位不許踰月罷爲汴州刺史夏五月
丁卯上以京師久不理命韋澳爲京兆尹豪貴皆畏之常執鄭
光庄吏責其逋租太后卽送與錢頃刻租入始以吏歸秋九月
有術者詒司農卿韋厘爲醜星辰以求夏州節鎮夜設醜具術
者反呼厘有異志令我祀天其家驚惶求以路免事覺而詰具
知其姦立付京兆杖死貶厘永州司馬駙馬鄭顥營求作相其
父祗德懼上嚴明與顥書求必死顥乃辭劇務罷爲秘書監自
此頌聲載道服上明斷刑政不濫稱爲小太宗十一月敕於靈
感會善二寺各置戒壇上每命相左右無知者壬辰前一日令
樞密宣旨以蕭鄴名付學士院王歸長覆奏鄴所判度支應罷
否上以爲漏洩卽手書戶部侍郎世慎由以易之

十一年春正月拜李景讓御史大夫上嘗欲黜穆宗以下四主于太廟景讓勸之竟亦不行丙辰上以驪山近真聖廟未嘗修謁屬陽和氣清中外事簡議欲行幸諫官并兩省懇勸遂止魏暮爲相議事上前他相或委曲規諷暮獨正言無所避上每嘆其有祖風心重之令狐綯等忌其剛直出爲西川節度使二月以崔慎由爲中書侍郎鄭朗監修國史並加集賢院大學士夏六月甲午封皇子淮衛王濠廣王秋七月庚子兵部侍郎蕭鄴同平章事仍判度支八月王紹鼎卒命昭王訥遙領鎮州大都督府長史成德軍節度大使以其弟王紹懿爲留後九月以秦州隸鳳翔將士不從乃復拜吐蕃酋長尚延心爲河渭都遊奕使復刺史李承勛於涇州乙未彗出於房長三尺上心篤好神仙聞軒轅集道術高士遣中使迎於羅浮山補闕陳叡拾遺王

譜薛廷傑皆諫命宰相慎由諭以萬機事繁躬親不服欲與之一言或冀少有補益向使少翁藥大復生不能相減是歲舒州吳塘堰有衆禽成巢高至七丈濶七尺鷹隼燕雀無不馴狎又有鳥人而綠毛爪紫皆紺色鳴聲曰甘人呼爲甘蟲

十二年春正月軒轅集至京師上召入禁中問以長生可學乎對曰王者屏欲崇德自然受天遐福何處更求長生一言不及伎術詭異問以曆數取筆寫四十字挑十字向上上欲留伺羅浮山別營一館不允過月餘懇許還山李涿在安南貪暴峯州舊有防兵六千涿奏罷之獨委酋長李由獨防守南詔以計誘降由獨安南始有蠻患壬子經略使王式至鎮有才略樹柵開墮選教士卒繒不敢犯戊午劉瑛守兵部侍郎同平章事上欲肆赦令狐綯謂所費甚廣上不悅崔慎由勸上若建東宮此事

卽爲有名上又不答乃罷二月甲子朔上疑舊事歸罪穆宗罷
公卿朝拜光陵及忌日行香悉移宮人於諸陵夏四月庚子嶺
南都將王令寰作亂囚楊發轉任涇原李承勛發鄜道兵以討
平之戊申兵部侍郎夏侯同平章事五月丙寅劉瑑病篤猶
手疏論事及薨上深惜之辛巳湖南軍亂都將石載順等逐觀
察使韓侂殺押牙王桂直詣山南東道節度徐商討平之六月
丙申江西都將毛鶴復逐觀察使鄭憲江西觀察使韋宙發隣
道兵斬之秋七月宣州都將康全泰又逐觀察使鄭薰八月甲
午淮南節度崔鉉宣歙觀察溫璋率團練兵討平之時因移代
諸鎮多停將士減削衣糧以爲羨餘朝廷因而獎勵率致變亂
右補闕張潛歷陳前弊上嘉納之九月容管奏都虞候來正謀
叛宋涯捕斬之安南饑亂相仍民圍交趾王式振甲登城追捕

斬獲略盡自是始修貢賦饗將士占城真臘聞者皆復通使冬
十月建州刺史于延陵赴任入辭上曰卿到彼爲政善惡朕皆
知之勿謂其遠延陵慚失緒到官竟不職貶復州司馬時刺
史新除必令至京而察能否令狐紉擬李遠杭州刺史上問其
嗜棋令試觀之又有人便道不赴見其謝表責云宰相有權
約懼時方寒流汗浹背每對宰相奏事旁無一人侍立其威嚴
不可仰視事畢始怡然閑語須臾復整容曰卿輩善自愛十二
月甲寅學士承旨蔣仲當次對從容言近日官頗易得人思僂
倖上驚曰如此則亂矣對曰如此不已亂亦非難上稱之再三
十三年春正月戊午朔赦天下三月割河東雲蔚朔隸大同軍
夏四月以蔣仲守兵部侍郎同平章事武寧軍康季榮不恤士
卒被逐貶於嶺南以左金吾大將軍田牟前有能名復以爲節

度使一方獲安五月帝餌醫官李玄伯道士虞紫芝山人王樂
藥疽發于背月餘不能視朝八月七日疽甚宰相百寮皆不能
見中官傳遺詔立鄆王爲皇太子勾當軍國事是日崩于大明
宮之咸寧殿壽五十以令狐絢攝冢宰羣臣上諡曰聖武獻文
孝皇帝廟號宣宗

則曰宣獻克君綽有令聞殄除父慝取謗慈恩復涅繼志
拔鄆匪人禍仍前車傷哉此身

天王 唐一之十七

懿宗皇帝諱漼宣宗長子母昭容晁氏以太和七年十一月十
四日生於藩邸賜名渾初封鄆王宣宗不甚寵以居十六宅餘
子反居禁中所愛第三子夔王滋嬖欲立之爲其非次故久不
決及病篤密以屬樞密使王歸長馬公儒宣徽南院使王居方

使立之左軍中尉王宗實不與謀出爲淮南監軍已受勅副使刁元質留之曰主上不豫已久除改真偽未可辨何不入見而去尚未爲晚宗實復入則帝已崩諸門增人守捉殷殷聞其謀叱歸長等拾長立幼罪當何如乃遣宣徽北院使齊元簡迎王立爲皇太子監國改今名收歸長三人殺之時八月七日也十三日樞前卽位年二十七改元咸通帝姿貌雄傑有異稠人藩邸時常經重疾郭淑妃侍醫藥見黃龍出入臥內疾間以告戒勿復言或見大雪帝寢室上獨無宣宗制邊陲樂曲有海宴棧通之詞大中末京城小兒壘布漬水紐之向口呼曰拔暈至是悉驗九月癸卯始聽政尊皇太后爲太皇太后追冊母爲皇太后加諡元昭拜王宗實驃騎大將軍令狐綯守司空蕭鄴右僕射夏侯孜兵部蔣伸工部皆尚書並知政事殺李玄伯三人加

何弘敬中書令張允伸同平章事冬十月辛卯大赦天下十一月戊午蕭鄴罷十二月甲申杜審權為兵部侍郎同平章事丁酉令狐絢罷白敏中復相南詔豐祐卒朝議因其不常擾邊子名酋龍音近玄宗廟諱停其冊禮酋龍乃自稱皇帝國號大禮改元建極遣兵攻陷播州

咸通元年春正月上御紫宸殿受朝二月葬貞陵辛卯浙東賊仇甫自稱天下都知兵馬使改元羅平大聚亡命聲振中原三月辛亥以王式為浙東觀察使發忠武義成淮南兵赴之左拾遺薛調言自兵興來賦斂無度所在羣盜半是逃民固須剪滅亦可閔傷夏五月勅禁州縣常稅外無得科率六月庚子甫降斬其將劉晔劉慶等二十餘人械甫送京誅之秋七月丁巳諸將共克郟城浙東平八月加式檢校右散騎常侍賞諸將官各

有差九月敏中有疾辭位冬十月追復李德裕官加贈己亥夏
侯攷罷安南都護李鄴復取播州十一月丁未有事於郊廟大
赦南詔引兵攻陷交趾鄴與監軍俱奔武州

二年春正月詔發邕管及鄰道兵救安南二月敏中罷以杜棕
兼門下侍郎同平章事上令內侍楊公慶封示宣宗大漸時請
鄴王監國奏令抵宰相無名者罪棕以非延英而示不敢以一
人獨擅刑法復封還之其事遂已夏六月癸丑轉鹽州防禦王
寬爲安南都護兼經略處置等使貶鄴儋州司戶又坐擅殺蠻
酋杜守登長流崖州秋七月南詔攻陷邕州經略使李弘源初
至無軍以絮坐貶建州司戶仍以前邕管經略段文楚補之九
月蔣仲罷以畢誠爲工部尚書同平章事冬十月遣神策將軍
康承訓率禁軍及江西湖南兵赴安南蠻兵引去

二年春正月上受尊號曰睿文明聖孝德皇帝大赦二月南詔復寇安南王寬告急以前湖南觀察使蔡襲代之率禁軍并諸道之師屯海門段文楚左遷威衛將軍三月左庶子蔡京冒稱有經濟才遣制置嶺南事還充荆襄以南宣慰安撫使上於咸泰殿爲內壇奉佛受戒怠於政事又於禁內開設講席自唱經梵夏四月己亥朔復勅兩街四寺各置戒壇駕親臨幸度僧尼賜與無度吏部侍郎蔣儉切諫加以獎諭竟不能從五月分嶺南爲二道以廣州爲嶺南東道命韋宙領之邕州爲嶺南西道命蔡京領之皆兼節度觀察處置等使京爲政苛慘邕人逐之貶崖州司戶賜死以觀察鄭愚代之各分兵備禦潤州人陳璠石上言江西湖南汴流運糧艱苦難濟引劉裕破盧循故事由海路轉運執政是之擢爲鹽鐵巡官往揚子院專督海運南軍

遂不闕供秋七月徐州軍亂舊募銀刀鴨旗門槍挾馬等軍騎肆逐節度使溫璋復命王式節度武寧軍令帥忠武義成破仇甫兩軍至鎮三日盡誅騎卒餘分配甲子改徐州爲團練使隸兗海節度宿州爲觀察使濠州復歸淮南事始平冬十月封皇子侑魏王誕涼王佖蜀王十一月封順宗子緝斬王憲宗子愷榮王十二月吐蕃奴號盟末始入貢

四年春正月庚午有事圓丘大赦是日安南再陷蔡襲泐海死蠻將楊思縉據城遠近谿洞蕪僚皆降之悉召諸道兵還分保嶺南西道上遊晏無節左拾遺劉蛻上疏今西涼築城南蠻侵軼陛下不形憂閔以示遠邇何以責人死力不聽二月甲午朔上歷拜十六陵庚子還宮秦州置天雄軍以前金吾將軍王晏實爲觀察使三月張義潮奏克復涼州兵部侍郎判度支楊收

與左軍中尉楊玄价相結拜同平章事夏四月南詔寇左右江
逼邕州鄭思懼自言儒臣無將略請任武臣詔以康承訓代之
發荆襄洪鄂四道兵萬人與俱復寇西川六月置行交州於海
門鎮以右監門將軍宋戎爲刺史閏月杜棕罷以兵部侍郎判
度支曹確同平章事秋七月辛卯朔日食壬辰勅以閣門使吳
應德等爲館驛使臺諫言宦人不宜侵御史之職上允而不改
十一月起居郎張雲劉蛻交論令狐綯秉權納賂謬除李琢致
生蠶寇其子瀉不宜授左拾遺綯上表論訴貶雲與元少尹蛻
華陰令改瀉詹事司直十二月畢誠罷以兵部侍郎高璟同平
章事乙酉昭義沈詢之奴歸秦結牙將作亂攻府第殺詢
五年春正月戊午朔以用兵罷元會諫議大夫裴坦疏奏天下
徵兵財賦方匱不宜過興佛寺優詔答之庚辰以京兆尹李

爲昭美節慶使誅歸秦二月左遷蕭鄴以牛叢爲成都尹三月
丁酉彗星出於婁長三尺司天詭奏名含譽瑞星上大喜康承
訓至邕蠻寇益熾詔發許滑青汴充鄆宜潤八州兵赴援踰月
與戰皆沒惟鄆兵後至其小枝夜縋城出率勇士燒營斬蠻首
五百大驚解去承訓追之殺掠甚衆奏捷中外皆賀夏四月加
承訓檢校左僕射自餘子弟親昵皆受賞燒營將枝反不加恩
軍中皆怨未幾左遷右武衛將軍五月夏侯孜薦高駢率禁軍
赴邕營丁酉詔下湖南桂州諸道兵馬綱運經過去處各賜本
錢三萬貫取息利以供館驛邕州以西黎嶺界內經蠻去處本
道各與瘞屍行奠又令徐泗團練選擇官健三千赴邕管防戍
事寧代還淮南兩浙海運商徒失業自今不許更有隔奪如官
吏妄行威福必議痛刑秋七月西川秦兩林鬼主擊敗南蠻殺

獲甚衆保塞城使杜守連不從南詔帥衆詣黎州降冬十一月
乙未兵部侍郎蕭真同平章事

六年春二月王舉復爲禮院檢討更中前議丁巳始以懿安皇
太后曹氏配饗憲宗廟室高彥罷以御史中丞徐商爲兵部侍
郎同平章事夏四月西川節度使牛勣奏於暹戎州築新安二
城功畢陳許大將顏復率衆戍之六姓蠻來攻爲復所敗遁去
秋七月封皇子侃郢王儼普王冬十二月太皇太后鄭氏崩諡
曰孝明是歲高駢自海門進兵收復安南自李琢失政陷沒十
年邕容界人不聊生至是方復故地

七年春正月戊寅朔上好宴樂供奉樂工近五百人宴設不時
水陸皆備併觀俳優不知厭倦曲江昆明瀟瀟南宮北苑昭應
咸陽所欲遊幸卽行不待置頓有司恆具飲食幄幃諸王立馬

以待扈從所費賞賚不可勝紀秋七月張義潮進甘峻山背鞍
鷹四聯延慶節馬二匹吐蕃女子二人八月僧曇延進大乘百
法門明論等冬十月楊收罷義潮又奏回鶻首領僕固俊克復
西川斬大將尚恐熱傳首京師十一月高駢奏蠻寇悉平始置
靜海軍拜駢節度使壬子肆詔諸州鎮各保疆域勿復進軍十
二月以翰林學士承旨路巖爲兵部侍郎同平章事

八年春正月丁未河中晉絳地大震二月張義潮來朝拜爲右
神武統軍命族子惟深守歸義軍三月上喜樂工李可及善爲
新聲命授左威衛將軍中書曹確固諫不聽夏四月帝不豫羣
臣希得進見五月丙辰疏理天下罪囚各降一等秋七月旱懷
州民訴于刺史劉仁規揭榜禁之民怒相與作亂逐仁規掠其
家貨久之乃定唐世綱紀于是大壞杜審權罷以駢馬于綜爲

兵部侍郎諸道鹽鐵轉運使同平章事九月上疾瘳

九年夏四月鳳翔少尹李師望利於專制方面特建議於嵩州
建定邊軍以控扼南詔朝廷從之拜師望嵩州刺史本軍節度
兼眉蜀邛雅嘉黎等州觀察統押諸蠻并領諸道行營制置等
使秋七月戊戌白虹橫且四方罷勛起殺都將王仲甫剽掠湘
潭衡山等縣衆始千人八月遣高品張敬思赦其罪送歸徐州
九月庚午攻陷宿州自稱兵馬留後冬十月丁丑陷徐州庚辰
遣押牙張瑄奉表詣闕求旌節不許攻破魚臺等十縣詔以康
承訓王晏權戴可師爲徐州行營四面招討使大發諸道及沙
陀吐渾遠颶契苾各兵以隨十一月丁酉夜向戌有妖星初出
如匹練亘空化爲雲沒在楚分賊據淮口漕驛路絕十二月庚
辰朔戴可師率沙陀吐渾部落與戰敗之賊棄淮南俄而大霧

賊將王弘立引衆奄至官軍大敗可師被殺晏權兵數退躬命秦寧節度使曹翺代其任是歲江淮旱蝗民不聊生

十年春正月上荒宴不親庶政委任路巖時討麗助者四十八將分董諸道兵七萬餘人屯柳子之西自新興至鹿塘三十里壁壘相屬其皮海州者亦數千人斷所過橋伏兵其側賊過盡燬之二月承訓遣朱邪赤心爲前鋒所向披靡一鎮兵咸服其勇己亥王弘立夜襲鹿塘寨沙陀合官軍爭出奮擊賊遂大敗白鹿塘至襄城伏屍五十里斬首二萬級溺死不可勝算弘立單騎走免所驅平民皆散山谷不復還營官軍得者釋之自是勝從先潰三月官軍進圍柳子寨四面縱火賊棄寨走沙陀以精騎邀之屠殺殆盡僞謀主周重勸建號夏四月壬辰殺節度使崔彥會及監軍張道謹判官溫廷皓焦瑀并親屬僕妾斷

郭厚本李湘手足以怖官軍戊戌罷令孤絢乙巳揚州督府行軍司馬馬士舉將兵三萬救泗州三道渡淮中流大譟聲聞數里賊大驚斂兵屯城西寨舉縱火焚之賊衆大敗斬首數千級殺王弘立吳廻退保徐城泗圍始解謀告承訓龐勛自將期以月晦來攻預令秣馬整衆設伏以待是日賊兵果至遇伏敗走五月下邳土豪鄭益來降六月徐商罷蔣伸疾免以戶部侍郎劉瞻同平章事士舉攻濠州拔招義鍾離定遠秋七月承訓克臨濠殺獲萬人遂拔襄城留武小雎等寨曹翔拔滕縣進擊豐沛守將朱玫舉城降二人乘勝長驅承訓拔第城抵宿州西翔拔下邳進攻徐州八月壬子承訓拔宿州辛酉彥曾故吏路審中開門納官軍勛走爲沙隨追及溺死徐州平冬十月賞功拜朱邪赤心左金吾上將軍賜姓名李國昌賞賚甚厚承訓檢校

左僕射同平章事馬士舉檢校司空淮南節度使曹勣檢校兵部尚書徐州刺史濠泗團練防禦等使和州崔寧開門延賊賜自盡家屬兄弟流貶遠州高錫望守城而死詔追榮之仍給復被害州縣租稅三年李師望激南詔以倖有功戍卒怨怒欲生食之西川將又恨師望分裂巡屬陰遣人招驃信是月傾國入寇朝命以竇滂代爲定邊軍節度使滂貪虐尤甚十一月寇擣州勒兵以拒十二月陷犍爲縱兵焚掠陵榮二州壬子陷嘉州滂單騎宵遁其夜蠻軍營於山下戍將苗全緒都頭安再榮夜攻蠻軍旣退復圍西川朝命左神武將軍顏慶復爲大渡河制置劔南應接等使宋威爲行營都知兵馬使將兵數萬與忠武武寧之師合擊蠻軍于漢州之毗橋大捷解西川圍拜蜀王佶開府儀同三司領成都尹劔南西川節度副大使而以盧耽知

節度事廢定邊軍復以七州歸西川

十一年春正月甲寅朔帝御正殿受冊曰睿文英武明德至仁大聖廣孝皇帝赦天下辛酉南詔復圍成都盧耽告急命支詳往軍諭令通和好二月癸未前瀘州刺史楊慶復殺傷蠻軍二千餘人焚其攻具乙酉支詳遣使與蠻約和丁亥蠻斂兵請和顏慶復以援兵將至不受庚寅復進攻城辛卯城中出兵擊之始退朝議貶竇滂康州司戶楊慶復爲東川節度使蜀軍皆受節制癸巳慶復至新都蠻分兵來鬪甲午破之乙未蠻步騎數萬復至宋威以忠武兵敗之死者五千餘人退保星宿山威距成都三十里進軍陀江驛蠻遣其臣楊定保詣支詳請和庚子官軍與蠻戰奪其升遷橋蠻遂遁去慶復使人築壅門城穿壅引水植鹿角分營鋪自是不敢復犯成都三月曹確罷以韋保

衡同平章事劉鄴判度支魏博衙軍惡何全皞酷政殺之推大將韓居雄爲留後時以用兵權停貢舉夏四月勅來歲復行五月光州民逐刺史李弱翁奔于新息秋八月乙酉同昌公主薨上鍾念殺侍醫韓宗紹等二十餘人宰相劉瞻論法太過上怒叱出之九月丙辰罷瞻江陵尹十一月辛亥禮部尚書王鐸同平章事時龐賊徐黨猶相聚爲盜丁卯勅賜徐州軍將綾絹十萬匹改徐州團練爲感化軍節度仍統徐宿濠三州泗州爲團練使割隸淮南十二月拜李國昌振武軍節度使

十二年春正月上以郭貴妃愛重公主思念不已命樂工李可及作嘆百年曲其聲悽惋出內庫雜寶爲首飾綾繩爲地衣歌舞常數百人又於安國寺作菩薩蠻舞如佛降生是月張允伸病請以子簡會權知兵馬事從之夏四月路巖與保衡爭權癸

卯譖巖罷成都尹出城路人擲以瓦礫所擢京尹薛能不能救
止五月庚申上幸安國寺聽講佛經賜僧重謙澈逢沉檀講坐
設萬人齋冬十月兵部侍郎劉鄩爲禮部尚書同平章事

十三年春正月允伸卒軍中推平州刺史張公素知留後事韋
保衡譖罷于琮以御史中丞趙隱爲戶部侍郎同平章事夏四
月封皇子保吉王傑壽王倚睦王上務巖酷刑法五月乙亥國
子司業韋殷裕狀論淑妃弟郭敬述陰事上怒杖殺之籍沒其
家併奪受狀閭門使田獻鈇紫配橋陵決閭門司閭敬直配南
衙及貶所善給事中杜裔休妻黨中書舍人崔沆太僕少卿崔
元季父河陰院官韋君卿皆爲遠州司馬司戶縣尉丙子于琮
又貶普王傳親黨連坐者尚書巖邢給事李貺張鐸左丞李當
侍郎王珮常侍李郁皆遠州刺史金吾李敬伸舍人封彥卿諫

議楊塾皆司戶承旨張楊司馬諸兄刺史于涓長史分司觀察于環袁州刺史于藹于篋配流尋再貶琮節州刺史六月義成節度杜愔奏潁州僧道百姓舉留刺史宗回清幹臨人方藉綏輯從之秋七月韋保衡欲私其黨裴條爲邯鄲左丞李璋方嚴出爲宣歙觀察使八月張義潮卒曹義金代領歸義軍節度使自後中原多故朝命不及甘州復爲回鶻所陷餘隸歸義者亦爲羌人據之冬十二月追上宣宗尊諡元聖至明成武獻文睿智章仁神聰懿道大孝皇帝李國昌特功驍橫專殺長史移鎮雲中稱病不赴男克用殺防禦段文楚據靈州自稱留後

十四年春正月辛未李克用暴亂雲朔代以太僕卿盧簡方國昌不奉詔上怒命太原崔彥胎幽州張公素帥師討之自是沙陀侵掠代北中原禍起庚午遣中使并僧往鳳翔法門寺迎佛

骨是日天雨黃土羣臣諫者甚衆四月八日佛骨至京師自開
遠門起綵綳夾道念佛聲震于地廣造浮圖寶帳飾以金玉香
舉花幡數里不絕上親御安福門迎禮內道場焚香膜拜設無
遮大會三日出於京城諸寺賜僧及善士金帛宰相以下爭捨
施不可勝紀士女雲合威儀盛飾入唐未見降德音釋繫囚五
月史部蕭倣改兵部侍郎同平章事南詔連寇西川黔南黔中
經略秦匡謀棄城而奔詔斬匡謀籍其家有司追捕親戚連坐
六月帝不豫秋七月戊寅疾大漸辛巳崩于咸寧殿壽四十一
韋保衡攝冢宰百寮上諡曰睿文昭聖恭惠孝皇帝廟號懿宗

冊曰天下大器睿鑑先知天不祚唐嘆息何爲佛骨早來
速免禍基

弘簡錄卷之九

終

弘簡錄卷之十

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之十八

僖宗皇帝諱僖宗第五子母貴妃王氏以咸通三年五月八日生於東內初名儼封晉王其年七月十八日兩軍中尉劉行深韓文約謀立爲皇太子權勾當軍國政事二十日宣遺詔柩前卽皇帝位時年十二封行深文約開國公居中執政八月丁未始聽政追尊母爲惠安皇太后九月癸卯赦天下貶韋保衡賀州刺史尋賜死流樂工李可及嶺南加王景崇中書令賜韓若雄名允中與張公素高駢並同平章事冬十月轉于琮太子少傅緣坐並放還復官乙未劉鄩罷蕭倣爲門下侍郎十二月

送佛骨還法門寺

乾符元年春正月上旬少政在臣下南牙北司互相矛盾自先朝來侈靡日甚翰林學士盧攜上言關東連年旱州縣不以實聞勸上亟行賑恤疏入不省兼以用兵不息賦歛愈急百姓流殍無所控訴往往相聚爲盜所在蜂起加之承平日久人不能戰每與盜遇官軍多敗自此不可救藥天下多事二月葬簡陵三月裴坦爲中書侍郎同平章事劉瞻復爲兵部尚書秋八月辛未瞻薨轉兵部崔彥昭中書侍郎同平章事冬十月戶部侍郎盧攜同平章事十一月庚寅日南至有事郊廟帝受尊號曰聖神聰睿仁哲孝皇帝大赦改元朝議前鎮太原李業能安輯沙陀部落拜其子鈞爲靈武節度使招諭國昌父子十二月党項回鶻寇邊南詔寇西川濟大渡河都知黃景復擊敗之蠻歸

至中途遇本國新發兵至相合復入援兵不至景復潰蠻乘勝陷黎雅州成都驚擾詔天平高駢赴蜀制置軍事仍大發長武邠州河東等道兵士赴援是歲鹽賊王仙芝起

二年春正月帝性冲駿專事遊戲與內園小兒教坊樂工狎昵賞賜鉅萬呼田令孜阿父擢爲右軍中尉政事一以委之專用菜核媚上而自招權納賄除拜賜假皆不關白庫藏空竭擅籍商旅宰相以下皆鉗口莫敢言丙戌轉高駢西川節度使復修邛崃關大渡河諸城柵又築城戎州馬湖鎮號平彝軍併城沐源川控蠻要路自是稍不敢入夏四月蜀突將畏駢刑罰嚴酷率衆爲亂監軍使人諭降之浙西狼山鎮遏使王郢等有功節度使趙隱賞以職名不給衣糧鳩黨萬人劫庫兵爲亂攻陷蘇常轉掠兩浙泛江入海至福建大爲民患命前巖州刺史高傑

爲左驍衛將軍充沿海水軍都知兵馬使以討之復起令狐絢
爲鳳翔尹六月蕭倣薨拜御史大夫李蔚中書侍郎同平章事
辛未王仙芝及其黨尚君長攻陷濮與曹州黃巢聚衆起應之
同剽州縣橫行山東民困重斂者爭歸之衆至數萬秋七月蝗
自東而西所過地赤京兆尹楊知至奏蝗不食稻皆抱荆棘而
死宰相入賀八月帝乘驢擊毬遊畋無厭右補闕董禹諫諍賜
以金帛而不能從時節鎮皆結宦官爲假子邠寧李侃請爲假
父華清宮使道雅贈官禹又上疏論劾楊復恭等惡之貶禹柳
州司馬冬十月昭義軍將劉廣逐節度使高湜自稱畱後以金
吾大將軍曹翔代之十一月羣盜倭淫剽掠十餘州詔忠武淮
南宣武義成天平五軍亟加招懷并討捕之十二月仙芝寇汀
州以平盧節度宋威爲諸道行營招討使左散騎常侍會元裕

副之方鎮遣兵並取處分

三年春正月天平軍遣將士張晏等救沂州還復雷禦北境盜賊晏等不從喧噪而奔下詔宣慰無得窮詰二月勅福建江西湖南諸道觀察刺史皆訓練士卒并天下鄉村各置弓刀鼓戟以備羣盜三月賜充海節度爲秦寧軍盧龍李茂勳致仕其子可舉知雷後事崔彥昭罷王鐸復入相南詔遣使者求和而盜邊不息高駢斬其使牒責之夏四月原州軍亂刺史懷恟食蒸逐之朝議東南綱運所由密詔汴徐泗節度防禦各選精兵爲遊奕將防衛五日一具平安狀聞六月雄州地震忽裂水涌出壞城廨廬舍秋七月朱威大破王仙芝於沂州城下百官皆賀八月仙芝連陷陽翟郟城朝議迫近東都督曾元裕守城池曹翔衛宮闕山南東道李福守汝鄧要路邠寧李侃鳳翔令狐

紂守陝州潼關九月乙亥朔日食丙子賊陷汝州東都大震乙酉轉陷陽武攻鄭州昭義監軍雷殷符破之于中牟冬十月南攻唐鄆陷郢復二州是月高駢築成都外城令游僧景仙入南詔說諭驃信使歸附許妻以公主驃信迎拜信用其言溫州刺史魯實奏王郢請降固求望海鎮使朝廷不許以爲右率府率十二月仙芝攻申光廬壽舒通等州鄭畋上言宋威淹留亳州殊無進討之意會元裕擁兵斬黃專欲望風退縮若使賊陷揚州江南皆非國有惟忠武節度使崔安潛威望過人請以爲都統右威衛上將軍張自勉驍雄良將官死使李琰西平之孫嚴而有勇請以爲副使以代威與元裕不聽王鐸固請赦仙芝罪拜爲左神策軍押牙兼監察御史遣中使卽斬州賜以告身仙芝甚喜巢以官不及已大怒二賊始分爲二是月青滄軍戍安

南還至桂州逐觀察使李瓚以右諫議大夫張禹漢代之

四年春正月王郢誘執魯實以右龍武大將軍宋皓爲江南諸道招討使更發陳許汴宋徐泗兵新舊合萬五千人受皓節制

二月郢攻陷望海鎮掠明州復陷台州刺史王葆退守唐典詔二浙福建各出舟師以討之王仙芝陷鄂州黃巢陷鄆州殺節

度使薛崇南詔會龍嗣死子法立龍嗣爲邊忠殆二十年國亦疲弊法好畋獵酣飲委國事於大臣遣使請和許之嶺南西道

節度辛讜奏減戍兵十分之七王郢橫行浙西鎮海節度裴瓌廢兵設備不輕出戰密招其黨朱實降之授金吾將軍郢黨悉

離散用橋鎮遏使劉巨容射殺郢餘衆皆平三月黃巢陷沂州夏四月壬申朔日食六月賊黨柳彥璋襲陷江州左武衛將軍

劉乘仁代任乘賊不意執殺之衆遂散秋七月都將李可封及

軍士戍邊還至邠州迫脅索糧崔安潛按誅之庚申仙芝黃巢合兵圍宋州張自勉將忠武兵往救殺賊二千餘人圍遂解八月仙芝復陷安州時朝政惟事姑息陝州觀察使崔碣與鹽州刺史王承顏素有政聲軍士不樂其嚴逐之朝議貶碣懷州司馬承顏象州司戶與貪暴致亂者同罰人皆惜之給事中楊損節度使李侃遣兵誅鹽州亂首王宗誠等衆始定乙卯仙芝陷隨復鄧州山南李福告急遣左武衛大將軍李昌言將鳳翔兵赴之冬十月河中軍亂逐節度使劉牟以京兆尹寶瓌爲河中宣慰制置使旋授節度使黃巢寇掠斬黃曾元裕擊破之十一月都監楊復光說降尚君長宋威劫取以爲己功諂侍御史歸仁紹等鞫問竟不能明十二月尚君長伏誅巢又陷匡城濮州張自勉將諸道擊之

五年春正月仙芝寇荆南陷其外城李福自將救之仙芝焚掠而去庚戌轉高駢荆南節度前帥楊知溫貶郴州司馬沙陀首領李盡忠陷遮鹵軍二月曾元裕大破賊於黃梅追斬仙芝傳首來獻尚讓率餘黨歸黃巢推以爲主詔授巢右衛將軍令就鄆州解甲巢竟不至三月陷朗與岳州元裕屯荆襄巢又自滑州畧宋汴乃分張自勉充東南而行營招討使巢攻衛南并葉與陽翟命左神武大將軍劉景仁充東都應援防遏使將河陽宣武昭義兵共衛東都時軍儲不足貸商旅富人出空名告身俾出錢救賜之判度支楊巖自陳才短不能濟辦辭職不許夏四月賊黨王重隱陷洪州江西觀察高湘出奔重隱使其將徐唐莒據洪州復掠湖南都將高傑逐觀察崔瑋巢又引兵渡江攻陷虔吉饒信等州饒州將彭幼璋合義營兵克復饒州別黨

曹師雄掠宣潤寇湖州鎮海節度裴璋遣兵擊破之是月南詔遣使來請和親禮部侍郎崔潛議駢不識大體傳笑後代盧攜欲與之鄭畋固爭不可遂致相訐上怒曰何以儀刑四方五月丁酉二相皆罷以翰林學士承旨豆盧瑑吏部侍郎崔沆並同平章事丁巳河東府藏空竭節度使竇滌遣都押牙康傳圭發土團兵屯代州將發求賞滌遣都虞侯鄧虔往慰殺之除曹翔代鎮河東捕殺亂首十三人六月仙芝餘黨復掠浙西移駢鎮海節度使秋七月沙陀兵焚唐林寧縣入忻州境八月戊寅翔往救又攻陷岢嵐軍外城敗官軍于洪谷晉陽閉門城守巢又寇宣州不克引兵攻浙東轉剽建州九月宋威卒以曾元裕代鎮平盧壬寅曹翔卒以戶部尚書李都代鎮河東李蔚罷以鄭從讜爲中書侍郎同平章事冬十月詔昭義李鈞幽州李可舉

與吐渾酋長安慶薩葛酋長米海萬合兵討沙陀于蔚州十一月尙嵐軍反應克用丁未命宣慰崔季康兼代北行營招討使沙陀攻石州季康救之復爲所敗鈞死洪谷十二月甲戌巢陷福州觀察使韋叻棄城走是歲土團軍頭董昌討王郢有功補石境鎮將

六年春正月高駢分遣部將張璘梁續屢破黃巢遂趣廣南二月辛未季康廻軍至靜樂士卒作亂奔歸太原爲都頭張錯郭拙所殺辛巳轉陝虢楊損於昭義邠寧李侃於河東皆節度使以代二將河東將賀公雅部卒掠三城作亂稱報冤將焚張錯郭拙之家李侃收繫臨刑泣言殺季康皆捕盜司軍士復取還侃收族捕盜司元義宗等三十餘家而令朱玫爲三城斬斫使將兵捕殺報冤將補公雅都虞候軍城始定侃稱疾赴京轉東

都畱守李蔚代鎮河東三月天平張勣卒牙將崔君裕自知軍
事淄州刺史曹全最討誅之夏四月庚申朔日食黃巢陷桂管
圍廣州朝議爲憂拜宰相王鐸招討使南面行營都統秦寧節
度李係兼湖南觀察使副之將精兵五萬并土團屯潭州以塞
嶺北之路五月黃巢移書求天平節鉞朝廷不許上表求廣州
刺史于琮謂寶貨所聚勿令賊得乃擬除幸府幸巢大怒詬執
政卽日攻陷廣州執節度使李迢使草表不從殺之轉掠州縣
冬十月高駢轉淮南節度使周寶代之劉巨容爲山南東道節
度使黃巢北還自桂州歷衡永抵潭州李係嬰城不出急攻陷
之尚讓乘勝進逼江陵王鐸畱劉漢宏守江陵自率衆趨襄陽
旬餘賊至士庶逃亡僵尸蔽野閏月李蔚有疾都虞候張鐸
肅推少尹丁球知觀察畱後十一月戊午遷定州制置王處存

於義武行軍司馬康傳圭於河東皆節度使黃巢北趨襄陽劉巨容與曹全晷合兵拒於荆門巢與尚讓渡江東走其勢復振攻陷鄂州外郭轉掠饒信池宣歙杭十五州衆至二十萬傳圭至晉陽殺張錯郭勗族其家十二月王鐸罷盧攜薦高駢代爲都統朝廷深倚之復命攜知政事是歲桂陽賊陳彥謙陷柳州殺刺史董岳

廣明元年春正月乙卯朔改元沙陀入鴈門關至忻州進逼太原二月辛亥陷太谷康傳圭遣將伊釗張彥球蘇弘軫分兵往拒弘軫敗還斬之軍士素惡傳圭貪暴因而作亂殺之奉彥球爲都虞候朝廷以太原兵驕拜鄭從讜爲節度使獨推亂首殺之名彥球慰諭委以兵柄河東遂安時帝不親政事專務遊戲由劔槩法算以至音律猜博無不精妙又好鬪鷄與諸王賭鷄

一頭價增至五十緡尤善擊毬語優人石野猪朕若擊毬應舉
應得狀元野猪謂曰使堯舜作考校恐不免放黜上無以應令
孜專權無上其兄陳敬瑄與上擊毬賭三川敬瑄得第一籌卽
拜爲西川節度使以代崔安潛左拾遺侯昌業疏言星文變異
社稷將危帝怒賜死令孜見羣盜日熾陰爲幸蜀之計奏其腹
心左神策大將軍楊師立羅元杲同鎮三川牛勗爲山南東道
節度使盧攜專制朝政亦倚敬瑄許南詔和親且不稱臣三月
高駢傳檄徵天下兵使張璘渡江擊巢賊退保饒州璘復克之
朝廷差以自安夏四月太僕卿李瑑爲蔚朔等州節度行營都
統汝州防禦諸葛爽爲振武節度以副之與李可舉赫連鐸共
擊沙陀鐸說降朔州將高文集執沙陀將傅文達其酋李友金
米游萬史敬存皆降克用自雄武軍引還舉文集可舉司馬韓

玄紹復破之於藥兒嶺李盡忠程懷信俱死獨與國昌并宗族
北入達靺五月巢屯信州遇疫多死致書高駢請降以求節鉞
駢所徵兵皆至恐分其功悉奏還之巢勢復振仍與駢絕秋七
月巢陷宣州自采石渡江聞天長六合駢上表告急自稱風痺
人情大駭復詔河南諸道發兵屯潞水泰寧節度齊克讓屯汝
州曹全晟爲天平節度使兼東面副都統以備之九月全晟與
巢戰頗殺獲以衆寡不敵退屯泗上待諸軍至併力進討高駢
竟不出兵賊遂擊殺全晟乘勝渡淮冬十月陷申州入潁宋徐
充等境十一月盧攜稱疾不出京師大恐庚申巢入汝州境自
稱天補大將軍壬戌日南至上御延英對宰相泣下令孜請選
左右神策弓弩手守潼關自爲把截上曰侍衛將士不習戰鬪
恐未足用乃進幸蜀之策崔沆盧瑑從而贊美令孜爲社稷

計三川帥臣皆其腹心比之玄宗時爲有備上不憚是日上幸左神策軍親閱將士以馬軍將張承範爲把截潼關先鋒步軍將王師會趙珂副之令孜總左右神策內外八鎮及諸道兵馬制置招討等使楊復光副之奏募坊市數千人以補兩軍丁卯賊陷東都壬申陷虢州移羅元杲鎮河陽周岌鎮忠武秦宗權爲蔡州刺史乙亥承範等發京師上御章信門臨遣十二月庚申朔至潼關民悉逃竄搜菁中得百人使運水壘石爲守禦計賊前鋒已抵關齊克讓與戰自午至酉方解士卒饑甚遂喧噪燒營而潰山關左禁坑入先時以椎商稅禁人往來藤灌茂密一夕踐爲坦塗辛巳賊復來攻承範力拒之自寅及申矢盡投石凡掘塹谷驅民填塞須臾平度縱火焚關亦由禁坑而入師會自殺承範變服脫走壬午巢入華州留將喬鈴守之癸未制

下授巢天平節度使甲申罷盧攜以左丞王徽爲戶部侍郎學士裴澈爲工部侍郎並同平章事丙戌方朝傳言賊至百官奔散令孜奉帝自金光門出惟福穆澤壽四王及妃嬪數人從行餘皆莫知丁亥賊前鋒將柴存入長安金吾將軍張直方帥文武數十人迎于霸上戊子巢入館于令孜之第其徒各出焚劫尤憎官吏得卽殺之庚寅盡殺唐宗室在長安者辛未入居大內壬辰僭位時車駕趣駱谷鄭畋迎謁請留鳳翔上不欲近寇決幸興元令畋徵諸道兵以圖收復招禁兵鎮關中者數萬人皆歸之軍勢大振丁酉車駕至興元詔牛勗楊師立陳敬瑄各豫爲備

中和元年春正月興元儲峙不給陳敬瑄請幸成都壬子車駕啓行敬瑄迎于鹿頭關辛未至綿州壬申以工部侍郎判度支

蕭遘同平章事丁丑至成都館于府舍裴澈來奔時詔令不通
乏人起草右拾遺樂朋龜謁拜川令改擢爲翰林學士二月乙
卯朔王鐸復相三月壬子加敬瑄同平章事遣黃頭軍使李鋌
將兵萬人犂成將五千人屯興平神機營使高仁厚將兵二千
益之辛酉召代北監軍陳景思詣行在請赦李國昌克用罪俾
立功討賊李友金資詔赴達靺甲子羣臣稍集朝者近二百人
及囚戮貢獻不絕加以蜀中富實士卒歡悅王微問道遣人奉
表拜爲工部尚書鄭畋傳檄天下宥州刺史拓拔思恭會邠延
節度使李孝昌義夏合盟討賊以權夏銀綬節度使屯于武功
四方風聞響應夏四月勤王兵大集王重榮屯沙苑王處存屯
渭橋畋屯盤屋唐弘夫屯渭北乘畋龍尾之捷進薄城中壬午
黃巢僞遁程宗楚恐諸將奪其功不會衆知由延秋門入處存

夜亦至坊市民喜開門迎入掠金帛婦女時賊尚露宿霸上謂知之引兵自諸門入襲軍士方負重不能走遂大敗死者什八九弘夫與焉處存收餘衆還營丁亥巢復入長安庚寅思恭與孝昌戰不利屯者皆散賊愈增勢五月乙未李克用將沙陀兵由河東入討復至陽曲榆次而歸忠武周岌降巢宗權據蔡州不從監軍楊復光說同舉兵遂克鄧州獻捷行在秋七月丁巳大赦改元黃頭軍使郭琪爲亂焚掠坊市令孜奉上保東城敬瑄遣兵擊之琪夜遁左拾遺孟昭圖上疏潛令殺之八月己丑夜星交流如織大如杯椀至丁酉乃止徐州支詳遣牙將時溥將兵討巢至中塗擢還逐詳自知軍事卽拜留後復光奏升蔡州爲奉國軍防禦以宗權爲使壽州屠者王緒攻陷光州自稱將軍宗權表爲光州刺史緒復任固始縣佐王潮爲軍正并弟

審知使典資糧九月辛酉封王子震建王昭義高潯初與王重榮攻克華州俄爲賊將李詳戰敗于石橋詳乘勝復取華州潯奔歸十將成麟殺之據有潞州天井關戍將孟方立復殺麟自稱留後是秋臨海賊杜雄陷台州永嘉賊朱褒陷溫州冬十月鳳翔行軍司馬李昌言以犒賞薄激怒軍士由興平屯所選襲府城鄭畋奔行在罷爲少傅分司拜昌言鳳翔節度行營招討使曹全曩與賊戰死軍中立其兄子存實爲天平留後十一月遂昌賊盧約陷處州青州軍亂逐節度使安師儒立平盧行營將王敬武爲留後時天下大亂江西將閔勗戍湖南還過潭州逐觀察使李裕武陵蠻雷滿襲朗州殺刺史崔翥陬溪人周岳亦聚衆襲衡州逐刺史徐顥石門蠻向環集麋獠數千攻陷豐州殺刺史呂自牧朝廷各以觀察留後刺史命之

汴州鎮是月上蔡人劉謙爲嶺南小校擊羣盜有功拜爲封州
刺史秋七月賜敬瑄鐵券詔從謙遊行在鄭畋罷以裴澈代之
十一月秦宗權圍許州復光將鹿晏弘帥所部自河中南掠襄
鄧至興元逐節度使牛勗自稱留後十二月升浙東爲義勝軍
以劉漢宏爲節度使

四年春正月癸亥朔上在成都東川節度楊師立作亂忌令孜
敬瑄權寵過盛心不能平又聞高仁厚許任東川徵師立爲右
僕射不受詔殺官告并監軍使舉兵數敬瑄十罪進屯涪城詔
削師立官爵命高仁厚將兵討之黃巢兵尚彊周岌時溥全忠
俱不能制復召李克用自陝渡河而東三月兵部侍郎判度支
鄭昌凝同平章事夏四月克用會許汴徐兗之師于陳諸將分
攻尚讓黃鄴於太康西華皆遁去巢聞之懼退保鄆城五月克

用同諸軍追巢次于尉氏賊至中牟值大雨不得渡聞諸軍至
大駭徒黨分潰將卒皆降獨李周楊景彪與巢同走封丘克用
追及敗之獲其幼男并所俘男女五萬口牛馬萬餘僞乘輿法
物并符印寶貨戎仗數萬巢東奔兗州甲戌全忠謀密克川不
遂殺陳景思等三百餘人歸罪朝廷庚辰時溥遣李師悅將兵
追巢於兗州六月鄆州朱瑄大敗賊於合鄉壬辰楊師立伏誅
獻首行在拜高仁厚東川節度使李師悅追賊至瑕丘殺獲殆
盡巢甥林言與俱走至太山狼虎谷之襄王村斬巢以降秋七
月壬午時溥奏捷上御太玄樓受之從官朝賀時全忠兵益強
克用累表請討上遣中使優詔和解八月就加克用特進封隴
西郡王以悅之自是二雄始有尋戈之怨矣九月己未加全忠
同平章事王徽爲京兆尹上以長安宮室焚毀故久留蜀徽招

撫流散繕治宮室百官盡有成緒鹿晏弘爲禁軍所攻棄城東
出擁衆大掠襄鄧還據許州周岷棄鎮走復稱留後其徒王建
韓建張造晉珣李師泰各率本軍歸朝授諸衛將軍十月關東
諸鎮表請車駕還京時令攷橫甚威制天子不得有所主斷帝
時語左右爲之流淚十二月丁亥朔王徽與留司百官同上表
請上還京上畏宗權寇掠殘暴尤甚于巢詔以來年正月仍賜
詔招撫之是歲建州人陳巖爲福建觀察使治有威惠閩人安
之餘杭鎮使陳晟逐睢州刺史柳超潁州兵馬王敬堯逐刺史
自領州事均州賊孫喜聚衆謀攻成都將馮行襲用計殺之朝
廷各授刺史均州西有長山當襄鄧孔道爲盜所據行襲討平
之蜀道始通

光啓元年春正月己卯車駕發成都青州人成汭據歸州南康

賊盧光稠據處州皆稱刺史倚譚全播爲謀主二月丙申大風

翔三月丁卯駕至京師己巳大赦改元時李昌言據鳳翔王重

榮據蒲陝諸葛爽據河洛孟方立據邢洺李克用據太原朱全

忠據汴滑秦宗權據許蔡時溥據徐泗朱瑄據鄆齊王敬武據

淄青高駢據淮南秦彥據宣歙劉漢宏據浙東皆自擅兵賦朝

廷不能制所制者河西山南劔南嶺南西道數十州而已郡將

復擅常賦藩侯廢置不自朝廷王業已蕩然矣秦宗權稱帝置

百官詔封時溥鉅鹿郡王朱全忠沛郡王充蔡州四面行營兵

馬都統以討之董昌敗劉漢宏攻陷越婺台明等州以爲鎮東

節度觀察使錢鏐代爲杭州刺史夏四月田令孜建議招募新

軍五十四都都千人請舉廣明故事自領安邑解縣兩地榷務

并鹽鐵使收利以贍之王重榮訴言河中地窘悉藉鹽課供軍

奏之不已詔乃徙重榮泰寧王處存河中重榮自負興復功不肯徙五月上受尊號冊曰至德光烈孝皇帝六月丙辰處存奏李可舉并王鎔欲分其地各領兵侵擾臣未敢離既而處存破可舉將李全忠懼誅反攻可舉舉室焚死滄州軍復逐其帥楊全攻立衙將盧彥威詔以保鑿都將曹誠爲節度使彥威德州刺史重榮累表奏令孜離間君臣數其十罪令孜結邠寧朱孜鳳翔李昌言合神策邠延靈夏之師以討之九月重榮求救太原十月克用率師南山陰地關十一月各軍對壘於沙苑十二月癸酉令孜敗攻及昌言走還本鎮神策軍散入京師肆掠乙亥克用逼京師令孜奉上復幸鳳翔於是王徽所葺官室亂兵復焚禾黍滿目焉

二年春正月辛巳朔上在鳳翔克用兵還與重榮表請車駕還

京誅令孜與孜令孜懼夜以兵劫帝幸寶鷄衛士從者纔數百
宰相以下莫知明日奔蹶皆爲亂兵所掠衣裝殆盡拜孔緯御
史大夫令選召百官皆以無袍笏爲辭緯獨還行在蕭遘亟召
朱玫迎駕癸巳玫至鳳翔令孜聞之復奉帝入散關孜追至遵
途驛遇嗣襄王煜與俱還山南西道節度石君涉焚絕棧道棄
鎮逃歸于孜駕由他道崎嶇危殆者數四二月三鎮及宰臣百
官上表罪狀令孜併其黨韋昭度請誅之令孜自知衆所難容
薦楊復恭爲觀軍容使嚴遵美內樞密使三月丙申駕至興元
承旨杜讓能并孔緯俱爲兵部侍郎充諸道鹽鐵轉運使並同
平章事夏四月壬子孜與昌言盟百官於石鼻驛迫奉襄王還
京師權監軍國孜自兼左右神策十軍使五月己卯朔字出箕
尾歷北斗攝提庚辰襄王僭位年號建貞蕭遘罷拜鄭昌圖中

書侍郎同平章事兼判戶部加攻侍中兼諸道鹽鐵轉運使裴
徹判度支李昌符通表典元詔加檢校司空時二帝並立諸道
貢賦多之長安不之興元從官衛士皆乏食帝流涕無以爲計
杜讓能建議復光與重榮昔破黃巢有誓若令致上意宜有回
心歸國之理乃遣諫議大夫劉崇望賫詔宣諭重榮聽命遣使
上表貢獻願討朱玫贖罪熅僞詔至太原稱帝已晏駕克用惡
而焚之恐天下疑已與玫合謀移檄與表稱乘輿播越不誅玫
無以自洗卽發蕃漢兵進討并逐李熅表至上下大悅六月以
扈蹕都將楊守亮爲金商節度兼制置使率師犄角共討朱玫
秋七月戊寅朔宗權陷許州殺鹿晏弘玫遣王行瑜進攻興州
感義節度楊晟棄鎮走守亮擊敗邠兵九月守亮拔鳳州授金
吾將軍滿存防禦使遂復興州冬十月壬子朔滑州軍亂逐安

師儒推衙將張驍朱全忠併殺之以牙將胡貞知留後自此義
成屬焉十一月蔡賊孫儒陷鄭州刺史李璠遁儒引軍攻陷河
陽逐諸葛仲方自稱節度使河陽將張全義據懷州李罕之據
澤州以拒之十二月辛酉王行瑜還長安斬攷及黨與數百縱
兵大掠死者蔽地百官奉襄王奔河中重榮執殺之咸至免獻
追降庶人黜其屬籍械裴徹鄭昌圖等於獄官僚遭戮殆半上
受慶賀是歲天平牙將朱瑾逐齊克讓詔授秦寧軍節度使
三年春正月乙亥朔上在典元拜王行瑜邠寧李鋌黔中李茂
貞武定顧彥朗東川楊守亮山南楊守宗金商皆節度使陳珣
宜狄觀察使張洎兵部侍郎同平章事二月乙巳朔潤州牙將
劉浩逐節度使周寶推度支使薛勣爲留後戊辰削奪田令孜
官爵長流端州三月甲申車駕還京次鳳翔李昌符恐白此恩

賞必踈托以宮室未完請駐蹕府舍法司處受僞官者重刑杜讓能爭免十八徹與昌圖斬首蕭遊賜死進讓能爵襄陽郡公增食邑三千戶是月王建據閬州逐刺史楊茂實自稱留後夏四月甲辰朔高駢爲畢師鐸所囚自總軍政五月壬午朱瑾與瑄合汴兵大破宗權於邊孝村孫儒聞之盡殺其民燒閬井而去王師遂收孟洛許汝懷鄭陝虢等州詔以楊守宗及汴將孟從益權知許與鄭州李罕之河陽節度使張全義河南尹楊行密出師攻畢師鐸求救於宣州觀察使秦彥遣其將秦稠助之甲午彥入揚州推爲節度使六月戊申昌符與天威軍頭楊守立爭道相毆擁兵燒行宮庚戌復攻大安門戰於通衢昌符兵敗退保隴州壬子命李茂貞討之甲寅王重榮爲牙將常行儒所殺推其兄重盈爲留後子珙權知陝虢重盈至河州執殺行

儒丙辰詔宰相鄭延昌修奉太廟時國力方困未暇遵依舊制請權以少府監大廳五間添造成十一間以備十一室之數從之七月壬申朔茂貞拔隴州刺史薛知籌降遂斬昌符昌仁等滅其家傳首來獻丙子拜茂貞檢校司空同平章事兼鳳翔尹隴右節度使韋昭度守太保兼侍中九月辛未朔師鐸殺高駢冬十月甲辰立皇子陞爲益王十一月宗權遣弟宗衡與孫儒將兵渡淮爭揚州秦彥師鐸聽命儒復殺宗衡併與二人同襲高郵時淮南久亂朝命全忠兼淮南節度東南面行營都統楊行密節度副使十二月顧彥珣王建連兵攻成都敬瑄告急詔中使諭之是歲蔡將僞山南東道留後趙德諶陷荆南節度使張瓌棄城去錢鏐克潤州劉浩走禽薛朗斬之

文德元年春正月己亥朔上在鳳翔贈鄭畋司徒并諡孫儒殺

秦彥非師鐸楊行密殺張守一呂用之二月乙亥帝不豫壬午發鳳翔已丑至京師庚寅大赦改元加宰相昭度司空緯與讓能左右僕射濬兵部尚書並開府儀同三司俱賜號持危啓運保又功臣復恭忠貞啓聖定國功臣李鋌檢校司徒平章事陳胤嶺南東道節度使藩鎮諸侯進秩有差三月戊戌朔日食既庚子帝疾復作壬寅大漸其夕崩於靈符殿年二十七在位十五年諡曰惠聖恭定孝皇帝廟號僖宗

冊曰唐曆將終僅延餘紀冲幼何知內傾外否雖有智者疇能善此